

**PARLIMEN MALAYSIA**  
**PEMBERITAHU PERTANYAAN DEWAN RAKYAT**

**PERTANYAAN** : Bertulis

**DARIPADA** : Dato' Haji Mohd Zaim bin Abu Hasan  
[ Parit ]

**SOALAN** : Dato' Haji Mohd Zaim bin Abu Hasan  
minta **MENTERI PERTANIAN DAN  
INDUSTRI ASAS TANI** menyatakan  
sejauh manakah memorandum  
persefahaman (MoU) yang  
ditandatangani oleh Malaysia dan  
Australia mampu meningkatkan  
kapasiti industri tanaman, ternakan,  
perikanan dan akuakultur.

## JAWAPAN

**Tuan Yang Dipertua,**

Memorandum Persefahaman (MoU) antara Malaysia dan Australia mengenai Kerjasama Pertanian ditandatangani pertama kalinya pada 8 Mac 2006 dan diperbaharui pada 3 Julai 2017. Objektif penting MoU ini adalah bagi menjalin dan mengukuhkan kerjasama pertanian antara kedua-dua negara dalam aspek pertukaran maklumat, perkongsian kepakaran, pemindahan teknologi dan pembangunan kapasiti.

Dengan termeterainya MoU tersebut, Malaysia boleh mendapatkan kepakaran Australia dalam membangunkan sektor pertaniannya berdasarkan pengalaman dan kejayaan negara tersebut dan seterusnya menjadi salah sebuah negara pengeksport produk pertanian terpenting dunia.

Antara program pembangunan kapasiti yang telah diperolehi melalui MoU ini adalah seperti berikut:

i) Sektor Tanaman:

Latihan dalam diagnostik tumbuhan untuk meningkatkan kecekapan pegawai pertanian Malaysia dalam mengawal masalah penyakit tumbuhan dan serangga perosak;

ii) Sektor Ternakan:

Bengkel kawalan penyakit virus Hendra untuk memperkasa keupayaan Malaysia dalam pengurusan risiko penyakit kuda; dan

iii) Sektor Perikanan:

Pemindahan kepakaran dalam penambahbaikan genetik untuk meningkatkan daya tahan udang laut terhadap penyakit oleh Sunshine Coast University Australia kepada Institut Penyelidikan Perikanan Malaysia; dan

Malaysia akan terus memanfaatkan hubungan kerjasama pertanian dengan Australia ini bagi meningkatkan kapasiti untuk meningkatkan keluaran pertanian demi jaminan bekalan makanan serta daya saing ekonomi negara.